

菩薩摩訶薩欲住六神通等當學般若波羅蜜

「大智度論」集粹之廿七

智
銘

往生品中說：菩薩住六神通。此間說：五神通是菩薩所得，六神通是佛所得。其所以有如此差別說法者，並無有咎。蓋第六漏盡神通有二種：一者、漏習俱盡；二者、漏盡而習不盡。習不盡故，言皆得五神通；漏盡故，言住六神通。

漏盡菩薩，云何復生？是因菩薩入法位，住阿鞞跋致地，未後肉身盡，得法性生身。雖斷諸煩惱，有煩惱習因緣故，受法性生身，非三界生也。阿羅漢煩惱已盡，習亦未盡，之所以不受生者，是阿羅漢無大慈悲，無本誓願度一切眾生；又以實際作證，已離生死故。

菩薩離五欲，得諸禪，有慈悲故，為眾生取神通，現諸希有奇特之事，令眾身心清淨。何以故？若無希有事，不能令多眾生得度。菩薩摩訶薩作是念已，繫心身中虛空，滅粗重色相，常取空輕相，發大欲精進心，智慧籌量，心力能舉身未？籌量已，自知心力大，能舉其身。二者、亦能變化諸物，令地作水，水作地，風作火，火作風；如是諸大，皆令轉易。

一切入是神通初道；先已一切入、背捨、勝處，柔伏其心，然後易入神通。復次，一切入中，一身自見地變為水，餘人不見；神通則不然，自見實是水，他人亦見實水。一切入觀處廣，但能令一切是水相，而不能令實是水；神通不能徧一切，而能令地轉為水，便是實水。以是故，二定力各別。

二定力變化事，皆實，非虛，聖人無虛也，三毒已拔故。以一切法各各無定相故，可轉地或作水相，如酥膠蠟是地類，得火則消為水，則成濕相；水寒則結成冰而為堅相；石汁作金，金敗為銅，或還為石。眾生亦如是，惡可為善，善可為惡。以是故，知一切法無定相故，用神通力變化，實而不誑。若本各各定相，則不可變。再者、諸賢聖神通，於六塵中隨意自在，見好能生厭想，見醜能生樂想，亦能離好醜想行捨心，是名三種神通。此自在神通，唯佛具足。菩薩得是神通，遊諸佛國；於諸異國語言不同，及去遠微細眾生不聞故，求天耳通。常憶念種種多象大聲，取相修行，常修習故，耳得色界四大造清淨色；得色便得遠聞，於天人音聲，粗細遠近，通達無礙。

禪經中說：先得天眼，見衆生而不聞其聲故，求天耳通。既得天眼、天耳，見知衆生身形、音聲，而不解語言種種憂、喜、苦、樂之辭故，求辭無礙智。但知其辭而不知其心故，求知他心智。知其心已，未知本所從來故，求宿命通。既知所來，欲治其心病故，求漏盡通。得具足五神通已，不能變化故，所度未廣，不能降化邪見、大福德人，是故求如意神通，應如是次第，今何以說先求如意神通？蓋衆生粗者多，細者少，是故先以如意神通。如意神通能兼粗細，度人多故，是以先說。復次，諸神通得法異、數法異。得法者多先求天眼，以易得故。行者用日月、星宿、珠火，取是等光明相，常勤精進，善修習故，晝夜無異；若上若下，若前若後，等一明徹，無所罣礙，是時初得天眼神通。餘次第得。復次，佛如所自得，爲人說次第。佛初夜分得一通、一明，所謂如意通、宿命通；中夜分得天耳通、天眼明；後夜分得知他心智通、漏盡明。求明用功重故，在後當說。通、明次第得，如四沙門果，大者在後。

菩薩於諸法皆易無難，餘人鈍根故，有難有易。復次，初夜時魔王來欲與佛戰，菩薩以神通力種種變化，令魔兵器皆爲瓔珞。降魔已，續念神通，欲令具足，生心卽入，便得具足神通。降魔已，自念一身云何得大力？便求宿命明，自知世世積福德力故。中夜時，魔卽遠去，寂寞無聲，慈愍一切故，念魔衆聲，生天耳神通及天眼明。用是天耳，聞十方五道衆生苦樂聲，聞聲已，欲見其形，而以障蔽不見故，求天眼。後夜時既見衆生形，欲知其心故，求他心智。知衆生心皆欲離苦求樂，是故菩薩求漏盡神通，於諸樂中漏盡最勝，令衆生得之。

菩薩有二種：一者、法性生身菩薩；二者、爲度衆生故，方便受人法身；生淨飯王家，出四城門，問老、病、死人，是菩薩坐樹王下，具六神通。菩薩神通先有而未具足，今於三夜所得，是佛神通。

菩薩欲知一切衆生意所趣向，當學般若波羅密。知一切衆生意所趣向，屬他心通，而他心通境界少，但知欲界、色界現在衆生心心數法，不知過去、未來及無色界衆生心心數法。凡夫通於

上四禪地，隨所得通處已下，徧知四天下衆生心心數法。聲聞通於上四禪地，隨所得通處已下，徧知千世界衆生心心數法。辟支佛通於上四禪地，隨所得通處已下，徧知百千世界衆生心心數法。上地鈍根者，不能知下地利根者心心數法；凡夫不知聲聞心心數法，聲聞不知辟支佛心心數法，辟支佛不知佛心心數法。以是故說：欲知一切衆生心所趣向，當學般若波羅密。

諸佛有無礙解脫，入是解脫中，能知一切衆生心心數法。諸大菩薩得相似無礙解脫，亦能知一切衆生心心數法。新學菩薩欲得是大菩薩無礙解脫及佛無礙解脫，以此無礙解脫，知一切衆生心心數法。大菩薩欲得佛無礙解脫，以是故，雖已說知他心通，更說欲知一切衆生心所趣向，當學般若波羅密。

心所趣向者，心不去不住而能知，如般若波羅密中說：一切法無來無去相，故心無來去。又言：諸法生時無所從來，滅時無所去，若有來去，卽墮常見。諸法無有定相，以是故，但以內六情、外六塵和合生六識，及生六受、六想、六思。以是故，心如幻化，能知一切衆生心心數法，無有知者，無有見者。如歎摩訶衍品中言：若一切衆生心心數法，性質有不虛誑者，佛不能知一切衆生心心數法；以一切衆生心心數法性質虛誑，無來無去故，佛知一切衆生心心數法，心若分別取相，則不得實法，不得實法故，不能通達知一切衆生心心數法；若不取相，無所分別，則得實法，得實法故，能通達一切衆生心心數法，無所罣礙。

一切衆生心心數法，可得知悉。何以故？如經中說：一切實語中，佛最第一。若不能悉知一切衆生心，得其邊際者，佛何以言悉知？亦不名一切智人。而佛語皆實，必應實有一切智人。復次，衆生雖無邊，一切種智亦無邊，若智慧有邊，衆生無邊者，則有邊智慧無法知無邊衆生。今智慧及衆生俱無邊故，故無邊智慧可知無邊衆生心心數法。衆生無邊，佛智慧無邊，是爲實。若人著無邊，取相戲論故，佛說是邪見。譬如世間常、無常，二俱顛倒，入十四難中，而佛多以無常度衆生，少用有常。若著無常取相戲論，佛說是邪見虛妄。若不著無常，知無常卽是苦，苦卽是無我，無我卽是空；能如是依無常觀入諸法空，便是實。以是

故，無常入真諦中是實。十四難中以著因緣故，說是邪見。是故說無常以明無邊，無邊故衆生厭生死長久。

復次，聞十方衆生無邊故，心生歡喜，受不殺戒，得無邊福，以是因緣故，初發意菩薩，一切世間衆生皆應供養。何以故？爲度無邊世界衆生故，功德亦無邊。有如是等益，故說無邊。以是故說：悉知一切衆生心所趣向，如日照天下，一時俱至，無不徧明。

菩薩摩訶薩欲勝一切聲聞、辟支佛智慧，當學般若波羅蜜。所謂聲聞、辟支佛智慧者，以總相、別相觀諸法實相，是聲聞智慧。如經中說：初以分別諸法智慧，後用涅槃智慧。分別諸法智慧，是別相；涅槃智慧，是總相。復次，知是法爲解，是法爲縛；是流轉，是來還；是生，是滅；是味，是患；是逆，是順；是此岸，是彼岸；是世間，是出世間。如是等分別二門諸法，名爲聲聞智慧。復次，分別三門諸法、四門諸法乃至空空三昧，無相無相三昧，無作無作三昧智；於其中間所有智慧，盡是聲聞智慧。般若波羅蜜義品中說：菩薩智慧相，與聲聞智慧，是一智慧，但聲聞智慧無方便，無大誓莊嚴，無大慈大悲，不求一切佛法，不求一切種智知一切法；但厭老、病、死，斷諸愛繫，直趣涅槃爲異。

聲聞智即是辟支佛智，但時節、利根、福德有差別：

蓋佛不在世，亦無佛法，以少因緣，出家得道，名辟支佛；利根各異，法相是同，但智慧深入，得辟支佛道；福德名有相，或一相二相，乃至三十一相。若先佛法中得聖法，法滅後成阿羅漢，名爲辟支佛，身無有相。有辟支佛第一疾者，四世行，久者、乃至百劫行；如聲聞疾者三世，久者六十劫。

佛說有四種沙門果，四種聖人：須陀洹乃至阿羅漢；五種佛子：須陀洹乃至辟支佛；三種菩提：阿羅漢菩提、辟支佛菩提、佛菩提。果中、聖中、佛子中，菩提中皆無菩薩，云何言菩薩勝一切聲聞，辟支佛智慧？蓋佛法有二種：一者，聲聞，辟支佛法；二者，摩訶衍法。聲聞法小故，但讚聲聞事，不說菩薩事。摩訶衍廣大故，說諸菩薩摩訶薩事：發心，修行，十地，入位，淨

佛世界，成就衆生，得佛道。此法中說菩薩次佛，應如供養佛；能如是觀諸法相是爲福田，能勝聲聞，辟支佛。如是摩訶衍經中，處處讚菩薩摩訶薩智慧勝聲聞，辟支佛。菩薩雖在諸結使煩惱欲縛三毒胎中，初發無上道意，未能有所作，而爲諸佛所貴；以其漸漸當行六波羅蜜，得方便力，入菩薩位，乃至得一切種智，度無量衆生，不斷佛種、法種、僧種，不斷天上世間淨樂因緣故，說法議論之音，勝於聲聞、辟支佛及諸外道。

是何因緣故，菩薩智慧勝於聲聞、辟支佛？本生經中說：菩薩智慧，於無量阿僧祇劫以來，令集衆智；於無量劫中無苦不行，無難不爲；爲求法故，赴火投巖，受剝皮苦，出骨爲筆，以血爲墨，以皮爲紙，書寫經法；如是等爲法故，受無量苦。以智慧故，世世供養其師，視之如佛；一切所有經書，悉皆誦讀、解說；於無量阿僧祇劫，常思惟籌量，尋求諸法好醜，深淺，善不善，漏不漏，常不常，有無等，思惟分別問難。爲智慧故，供養諸佛及菩薩、聲聞，聽法問難。信受、正憶念、如法行。如是智慧因緣具足故，云何不勝阿羅漢、辟支佛？

復次，菩薩智慧，五波羅蜜佑助莊嚴，有方便力，於一切衆生有慈悲心故，不爲邪見所妨。住十地中故，智慧勢力深大，大因故勝於聲聞、辟支佛。以大因故，小者自壞；阿羅漢、辟支佛無是事，以是故言，欲勝聲聞、辟支佛智慧，當學般若波羅蜜。

菩薩欲得諸陀羅尼門、諸三昧門，當學般若波羅蜜、陀羅尼門，如讚菩薩品中說。門者，得陀羅尼方便法是。如三三昧名解脫門。何者是方便？若人欲得所聞皆持，應當一心憶念，令念增長，先當作意於相似事，繫心令知所不見事；如周利槃陀迦，繫心拭筆屢物中，令憶禪定，除心垢法。如是初學聞持陀羅尼，三聞能得；心根轉利，再聞能得，成者一聞能得，得而不忘，是爲聞持陀羅尼初方便。或時菩薩入禪定中，得不忘解脫；不忘解脫力故，一切語言說法，乃至一句一字，皆能不忘，是爲第二方便。或時神咒力故，得聞持陀羅尼。或時先世行業因緣，受生所聞，皆持不忘。如是等名聞持陀羅尼門。

菩薩聞一切音聲語言，分別本末，觀其實相，知音聲、語言念念生滅，音聲已滅，而眾生憶念取相，念是已滅之語，作是念言，是人罵我而生瞋恚；稱讚亦如是。是菩薩能如是觀眾生，雖復百千劫罵詈，不生瞋心，百千劫稱讚，亦不歡喜。知音聲生滅如響相，又如鼓聲，無有作者。若有作者，是無住處。畢竟空故，但誑愚夫之耳；是名入音聲陀羅尼。菩薩得是一切三世無礙明等諸三昧，於一一三昧中，得無量阿僧祇切陀羅尼。如是等和合，名爲五百陀羅尼門，是爲菩薩善法功德藏。如是名陀羅尼門。

諸三昧門者：三昧有二種：聲聞法中三昧，摩訶衍法中三昧。聲聞中三昧者，所謂三三昧。復次，三三昧：空空三昧，無相無相三昧，無作無作三昧。三昧卽是三昧門，佛諸三昧，無量無數，如虛空無邊，菩薩云何盡得？菩薩聞是，心則退沒。以是故，佛說三昧門，入一門中，攝無量三昧。行是方便，得是三昧，是名三昧門。如是展轉乃至九地是十地三昧門，十地是無量諸佛三昧門。如是等名爲諸三昧門。

陀羅尼門、三昧門，二者有異。三昧但是心相應法也，陀羅尼亦是心相應，亦是心不相應。如人聞持陀羅尼，雖心瞋恚亦不失，常隨人行，如影隨形。是三昧修行習久，後能成陀羅尼；如象生久習欲，便成其性。是諸三昧，共諸法實相智慧，能生陀羅尼。能持菩薩二世無量功德，菩薩亦因之而度得至佛。如是等三昧，陀羅尼種種差別。

聲聞不大殷勤集諸功德，但以智慧求脫老、病、死苦；以是故，聲聞人不用陀羅尼持諸功德。菩薩爲一切衆生故，須陀羅尼持諸功德。再者，聲聞法中，多說諸法生滅無常相故。諸法無常，若無常相，則不須陀羅尼，何以故？諸法無常相，則無所持，唯過去行業因緣不失。如未來果報，雖無必生；過去行因緣亦如是。摩訶衍法，生滅相不實，不生不滅相亦不實，諸觀諸相皆滅，是爲實。若持過去法則無咎，以持過去善法善根諸功德故，須陀羅尼，陀羅尼世世常隨菩薩。諸三昧不爾，或時易身則失。如是等種種分別陀羅尼、諸三昧。以是故言，欲得諸陀羅尼、諸三昧門，當學般若波羅蜜。



本刊調整售價啓事

本刊自發行以來，荷承

四象大德，鼎力護持，熱心推介，銷行日廣，遍及全球。爲酬答各界愛護之雅意，自一九八〇年底，調整價格以來，迄將三年，雖期間物價倍蓰，一仍維持原價，茲者郵費又告增加，不敷更鉅，不得已於一九八三年十月一日（卽一三九期）起，調整爲每期港幣四元，以資挹注茲將新訂價目表附刊於後，敬祈垂鑒爲荷

內明雜誌社謹啓

定價表

香港	另售每册港幣 4.00	全年十册連郵費	港幣 50.00
台灣	全年	平郵	US \$ 8.00
		空郵	US \$ 12.50
日本	全年	平郵	US \$ 8.00
		空郵	US \$ 12.50
泰國	全年	平郵	US \$ 8.00
		空郵	US \$ 12.50
菲律賓	全年	平郵	US \$ 8.00
		空郵	US \$ 12.50
新加坡	全年	平郵	US \$ 8.00
		空郵	US \$ 12.50
馬來亞	全年	平郵	US \$ 8.00
		空郵	US \$ 12.50
美國	全年	平郵	US \$ 10.00
		空郵	US \$ 15.00
加拿大	全年	平郵	US \$ 10.00
		空郵	US \$ 15.00
英國	全年	平郵	US \$ 10.00
		空郵	US \$ 15.00
歐洲	全年	平郵	US \$ 10.00
		空郵	US \$ 15.00
澳洲	全年	平郵	US \$ 10.00
		空郵	US \$ 15.00

